

3  
444  
LA VRENTIVS  
BEYERLINCK

Archipresbyter Antuerpiensis

PROFECTIONIS

MARCI ANTONII

DE DOMINIS

quondam Archiepiscopi Spalatensis

CONSILIVM EXAMINAT.



BIBLIOTHECA NAZ.  
ROMA  
VITTORIO EMANUELE

ANTVERPIÆ,  
EX OFFICINA PLANTINIANA,  
Apud Balthasarem & Ioannem Moretos.

M. DC. XVII.

1890

3 445  
LAVRENTII BEYERLINCK

*Archipresbyteri Antuerpiensis*

# EXAMEN

## PROFECTIONIS

M. ANTONII DE DOMINIS

*quondam Archiepisc. Spalatenfis.*

**P**RODIIIT his diebus ex  
Typographeio Hagienfi li-  
bellus, cuius frons ad om-  
nem splendorem compo-  
sita, Professionis *Marci*  
*Antonij de Dominis*, Archiepiscopi Spa-  
latensis, consilium proponit, & expo-  
nit. Hic ut in manus meas venit, tam-  
quam ad res novas concurrere animus,  
& inaudita percontari, sibi que impri-  
mere ignotum nobis Antistitem, Chri-  
stianæ fidei deliquium, quod inaudiui-  
mus nuper, apud remotissimas gentes  
veritatis propagandæ zelo restauran-

tein. Accessi, vt ad veritatem soleo,  
 stabili pede: neque adspexisse satis erat,  
 nisi & inspicerem penitiùs, & lustrarem  
 non adyta solùm, sed quæ abdita insu-  
 per, fumum fucumque sermonis, &

*Ignem suppositum cineri dolofo.*

Stupeo. Ecquid, inquit, Profectio hæc  
 est, an Defectio? quis litterio hæc con-  
 fundat, aut æquet? Hæreo: &, en de  
 prædamnatitiis olim suscitari hæresin,  
 tamquã Cerberum aliquem ab altissi-  
 mis inferis, & excussa à veteri auenâ fal-  
 sitatis semina rursus Ecclesiæ Catholi-  
 cæ agro è triuiis inspargi, inferi, super-  
 feminari subdolâ verborum viuacitate  
 deprehendo. Video in ipso accessu, Epi-  
 scopum, non qualem Timotheo præ-  
 scripsit Gentium Doctor, sed reprehen-  
 sibilem, domui suæ malè præpositum,  
 arundine vento agitatâ mobiliorem:  
 pastorem & idolum derelinquentem  
 gregem suum: renatum à dubiâ sam-  
 buco Iudam, vt Dominum suum per-  
 fidorum manibus tradat, Apostolico-  
 rum

rum virorum collegio sponte se abdicantem, & ex felici Christianæ disciplinæ gremio ad pestilentiaæ cathedram,

*Et penitus toto diuisos orbe Britannos,*  
 profugientem : atque hinc velut mediis in vndis tranquillum , Apostolicæ Sedis primatum , ipsamque Ecclesiam supra petram ædificatam, delirantis cerebri cauillationibus iam olim protritit profligatisque, maledicè proscindentem. An ergo post tot sæcula rursus egressâ à senibus iniquitate prostituetur Susannæ innocentia ? & committemus , vt sexaginta propè annorum verendus aliquando Antistes , personatâ abdicatæ functionis maiestate, in beneficam Matrem iniurius , eam laceret , rodât , exedat? collectaque adulteratarum Scripturarum, Veterumque compendia fronte meretriciâ obtrudat iis, qui Malchi instar dextrâ aure abscissâ, sinistram ad omnem falsitatis sonitum aperiunt?

Igitur non abs re futurum existimaui, si Presbyter Episcopo, Archipresbyter

In Pro-  
treptico.

Archiepiscopo, quia reprehensibilis est, in facie resisterem: & è castris Philisthinorum viuentis Dei agminibus exprobrantem Dalmaticum Goliath, omnidolo plenum, iuuenis atque inermis solâ veritatis fundâ, quam angularis Ecclesiæ lapis oneret, primus adorirer; eiûsque consilium à patre mendacij, nequitix spiritu, sub vitæ occasum (quo iuxta Clementis Alexandrini monitum, salutis initium suscipiendum fuerat) suggillatum, tam improbæ defectionis, à plerisque qui genium ingeniumque viri intus & in cute olim nouerant prænuntiata, ad examen velut nouam incudem reuocarem.

Multa fanè iustæ indignationis dolor animo proponebat, quæ opportunè in medium adduci poterant, imò debebant: verùm ab iis omnibus mentem & manum temperaui, calamumque ad eruendas infamis fugæ causas in Dalmatiam properantem retardui, ne potiùs obtreccionis iniuriosereus,

reus, quàm zelosus veritatis assertor fierem. Quippè hæreticis ceu proprium adscribit in Epistolis Augustinus, *hominum crimina colligendo, abscessionis sue causam defendere: cumque ipsam divinæ Scripturæ veritatem, qua ubique diffusa Christi Ecclesia commendatur, criminari & obscurare nequeant, homines per quos prædicatur, in odium adducere, & de iis quidquid in mentem venerit, fingere.* Quibus perquam simillimus Marcus Antonius de Dominis, non alio colore hanc apostasiæ infamiam depingit, quàm qui ex resumpto veterum hæresiarcharum vomitu coaluit. Vnde & Romani Pontificis maiestatem, ceu fictam & fastuosam; eiusque regimē, ut turbidum, violentum, noxium; iudicium, tamquam inutile, erroneum, mendax traducit: & *dilatat sicut infernus os suum*, dum inflatis arrogantiae buccis, quasi hæctenus non satis augustum perfidiæ & votifragio trophæum erexerit, compilatas suffocatorum prioribus sæculis errorum

lacinias, quibus & suos auersis Docto-  
rum Ecclesiæ vestigiis stabiliat firmet-  
que, velut novas Acheronticæ turbæ  
aquilas, decem se libris propediem cre-  
cturum promittit. At

*Quid dignum tanto feret hic promissor  
hiatu?*

*Parturient montes, nascetur ridiculus  
mus.*

Non erit nouo Hercule opus, qui mon-  
stra illa feriat toties prostrata: poterit  
quiuis tandem è grege fidei scuto mu-  
nitus, detegere comparata ad fraudem  
patrocinia Scripturarum & rationum,  
& despumato stomacho digerere co-  
ctam toties & recoctam, longoque præ-  
dore obsitam cramben, quam incon-  
dîtus hic hospes postliminiò apponet,  
ex turbidis Lemanici etiam lacus gur-  
gitibus, quibus incautus immergitur,  
confarcinatum.

Igitur studio à me prætermittentur;  
quæ iam pridem de hoc sene fama vul-  
gauit: neque enim curiosus indagator  
existam,



existam, quis de eo aut sermo, aut sensus. Satis fuerit propriâ confessione reum constitui, quando & per Nuntium Apostolicum Venetiis commorantem non semel monitum corruptumque se, suppressâ tamen vllius rei culpâ, prædicat, tam sciri & æstimari auidus, quàm qui Ephesino delubro facces olim subieccerat. atque adcò illi non satis visum

*Quid didicisse, nisi hoc fermentum, & quæ simul intus*

*Innata est, rupto iecore, exierit caprificus. Quasi pro nihilo ducatur, si à superiore Legato Archiepiscopus crediti muneris admonetur, & ob repetitam sæpiùs culpam iterùm atq; iterùm corripitur: cùm aduersus Presbyterum Apostolici præcepti tenax Ecclesia accusationem non temerè recipiat, atque sacrorum Ca-* 1. Tim. 5.  
*nonum decreto, Præsul non damnetur* Cap. Præ-  
*nisi septuaginta duobus testibus: eò quòd* sul.  
*tales in Ecclesiâ institui debeant, quorum*  
*sanctitati plus credatur, quàm multis testi-*  
bus.

*bus.* Dissimulauerit quidem, vt mollius cum Antistite, eoque Primatē, ageretur, Illustrissimus Nuntius, vincula compedesque & meritos carceres non adhibuerit, peccati scelerumve emendationem longā bonitate exspectans; quod quæso innocentia suæ præsidium infert ille præter turpem fugam, quam sibi cum mortalium omnium nequissimis communem voluit, parem cum iisdem gloriam consecuturus? Stabilis est innocentia, non metuit vincula, non horret lictores, Iudicis vultum sustinet, ridet famæ mendacia: omnemque calumniæ tristitiam mens recti conscia discutit, *quam qui Deo obtulerit, satis pie religioseque litauit.* Portentosa illa integritas, quam fuga adornat, quam nocentes tuentur.

Lactanc.  
lib. 6. di-  
uin. Insti-  
tut.

Contra  
epist. fun-  
dam. c. 6.

Serm. de  
zelo & li-  
uore.

Fontem omnis hæresis ( idem de apostasiâ cense, quæ illius comes ) superbiam dixit B. Augustinus: quâ, teste Cypriano, *Vinculum pacis rumpitur, charitas fraterna violatur, adulteratur veri-*

*tas,*

tas, scinditur vnitas, ad hæreses & schismata profilitur. Ab hac scaturigine noui scelerum, vtputa auaritiæ, ambitionis, libidinis riui erumpunt, ad quos ceu infames quosdam scopulos fides alliditur, dum eos auidè consecretantur, quibus vna cura, ne dicam voluptas, inconsutilem Christi tunicam scindere. Hæresim numquam primum peccatum, sed grauioris peccati pœnam docent veterum Annales. Nec est quòd ad veteres prouocemus, in foribus sunt qui id clament, quorum ruinam vitæ anteaetæ corruptela expressit priùs quàm dedit, quiq̃ue etiam mox fugâ elapsi, ne de libidine suâ cogantur erubescere, publicam ac receptam Ecclesiæ doctrinam, quâ ceu speculo redarguuntur innata in eis vitiorum sarmenta, pro arbitratu suo reiciunt; & vt verba D. Augustini usurpem, *auctoritatem stabilissimam fundatissimæ Ecclesiæ, quasi rationis nomine & pollicitationis superare omni molimine contendunt.* hinc adaman-  
tina

Epist. 56.

tina aliàs votorum vincula quouis vitro fragiliora , imò impia , crudelia , satanica. Falsa omnia quæ Religio Christiana de peccati conscientia & horrore proponit. Potestas denique in Ecclesia docendi, interpretandi, monendi, non alia, quàm quæ in singulis sedet, interioris spiritus, qui plerumque spiritus est fornicationis, reuelatione stabilita.

1. Cor. 2. *Animalis homo non percipit ea quæ sunt Spiritus Dei: cuius vnitas est in vinculo pacis, quod carnales illi violant, ab omni charitate, adeoque virtute, cuius illa est radix, alieni. Sic enim post B. Cyprianum in lib. De vnitate Ecclesiæ, grauius & verè scripsit iteratò repetendus*

Lib. De verâ Reli. cap. 8. *Augustinus, Ex his hominibus hæreticos (apostatas, schismaticos) fieri, qui si essent in Ecclesia, nihilominus perirent. Si*

1. Ioan. 2. *namque fuissent ex nobis, vt dilectus Christi discipulus ait, mansissent vtique nobiscum. Neque enim qui supra petram & Christi amorem, sed qui super arenam & caducarum rerum voluptatem*

tem

tem domum suam ædificauit, irruente  
procellâ damnum sustinuit, *facta que est* Lue. 6.  
*ruina illius magna.* Solida grana nullus  
doctrinæ turbo attollit, leues paleæ  
sunt quæ circumaguntur. Virtutum  
Regina est Constantia: cuius in rebus  
humanis vnum opus est, non moueri.  
Ab hac profugus *M. Antonius de Do-*  
*minis*, suorum & maximè domestico-  
rum curam exiit, & apud illos perfidi-  
æ suæ latebras quæsiuit, quibus non  
ad cōtemptum modò, sed necem insu-  
per & barbaros cruciatus fatis est, Deo  
esse consecratum. Cumque vel maxi-  
mè linguam suam acuat, vt Romanæ  
Ecclesiæ, quam Ecclesiarum omnium-  
que fidelium matrem non semel pro-  
fessus est, Monarchiam proscindat pro-  
teratque, ad illos indelebili fugæ notâ  
primum dilapsus est, quorum bona  
pars eandem non ita pridem in opti-  
matibus plerisque adeò firmâ impieta-  
tis peruicaciâ constituerunt, vt si quis  
negat aut abnuat, Ecclesiæ communio-  
ne

ne arcendus , clâssicâ Antichristiani conciliabuli definitione pronuntietur. Ex quo improbitatis semente , quanta iniuriarum messis vsque in hunc diem ! Verendum sanè , ne & profugam cernicem vacillantis Episcopi demetat aliquando Monarchica quædam securis , si diuersum à vulgo sentiat ; vel vt minùs , dum fugæ præsidio novos honores , stipendiaque lautiora inuenire satagit , chamæleontem e mentito palpationis fucò , & assumptis nouorum dogmatum coloribus exprimat ; quoque nullum ambiguitati locum relinquat , portentoso aliquo iuramento per fas nefasque vltro se obstringat. Sunt etenim enormium criminum fossæ sibi inuicem subordinatæ , vt ex vnâ in aliam successiuo lapsu descendatur : Deoque proprium est , perditam aliquamdiu vitam , in his præsertim quorum lucem coram hominibus lucere oportuerat , veritatis & fidei lucernâ destituere , perditosque homines *in desideria*

*deria cordis eorum , passiones ignominia , & reprobum sensum tradere.*

Venio nunc ad fucum scopumque fugæ. & hic quidem mihi collimandus, ille detegendus. Scopum proponit bonæ ædificationis fructum in piis multorum animis, quem ex profectiois suæ consilio accepturi sunt. *Non potest* Matth. 7. *arbor mala bonos fructus facere.* Bona ædificatio idoneam membrorum compagem, qualis illa ex quâ corpus Ecclesiæ compactum est, postulat; inutilia sunt sarmenta quæ à radice præscinduntur *ad circumventionem erroris*, ut in spirituali ædificio vigorem præstent aut firmitatem. *Veritatem facientes in* Ephes. 4. *charitate*, monita sunt Doctoris Gentium, *crescamus in illo per omnia qui est caput Christus, ex quo totum corpus (Ecclesiæ) compactum, &c. augmentum corporis facit in ædificationem sui in charitate.* En coagulum Christiani ædificij, & velut animam, charitatem. hanc non habet, qui Ecclesiæ vnitatem non amat.

amat. Non vides, si pes luxetur, & à iuncturâ abeat, totum corpus infirmari? ita nulla firmitas quamuis promissa, piorum animis speranda vel expectanda, si quis gradu aut munere relicto aliud inuadat, & ab illâ se segregat societate, quæ *per sedes Apostolorum, & successiones Episcoporum, certâ per orbem propagatione diffunditur*. Tenent pij omnes hereditatem Christi, hanc venerantur, huic seruiunt: de hac omnes, qui Ecclesiam Romanam profitemur vnicam salutis anchoram, securi sumus; *cuius vnitati qui non communicat, doctissimi Augustini iudicio, foras exijt*. Neque quòd decennali deliberatione instructa hæc fuga, radicatam in Christianâ fide mentem quatiet. Nam vt in corpore tabes alitur, & per membra serpit donec vniuersum occupet: sic non nisi per vitiorum semitas deuenitur ad omnium malorum compendium, & velut alteram Pandoram, hæresim seu apostasiam. nemo enim



enim derepentè nequissimus euadit,  
sed per gradus; quamuis animus semel  
prauâ voluntate vitiatus ægrè coërceri  
queat,

*Si modò cultura patientem deneget  
aurem.*

Iam quòd in studiis sacris iuxta Ro-  
manæ Sedis placita fuerit à puero in So-  
cietate I E S V enutritus, & non in vnâ  
cathedrà constitutus professor, tan-  
demque ad Episcopatum, Patribus So-  
cietatis id ægrè ferentibus, euectus,  
haud quidquam momenti ad persua-  
dendum habet, quamuis Scripturarum  
flosculis tanti lapsus ruinam velare con-  
tendat, & erroris simulacrum erigat, vt  
illius adoratione rudiores illaqueet.  
Norunt quippe omnes queis vel mica  
salis in pectore, in eodem reti bonos  
& malos pisces concludi: vnâ arcam  
granum continere & paleas: munda  
pariter atque immunda animalia re-  
cepisse operosam illam Arcam: adeo-  
que nihil omni ex parte beatum quoad

hîc viuimus, vt nulla sit tam exigua societas, quam non aliquis Dauus lancinet aut commoueat. Nónne de Apostolatu præuaricatus Iudas, *suspensus crepuit medius?* & qui seruiunt Deo non sunt stabiles, & in Angelis suis reperit prauitatem. Duxerat eius vultum sub suo pollice Societas, cui se à puero supposuerat, mentemque variâ disciplinarum suppellectili instruxerat, quando & erumpentes ambitiosæ vanitatis igniculos, periti ingeniorum æstimatorum velut indices subsecutæ turpitudinis, taciti secum considerabant. vnde & meritò verebantur, quod non inopinatò euenit, vt ad altiora honorum culmina euectus ille insolentis fortunæ & blandientis luxuriæ frænos cohibere negligeret, ob eamque causam ei satius fore perspicerent, si in humili Societate abiectus coram hominibus detineretur, quàm vt solutis obedientiæ clathris præesset, qui subesse nondum perfectè didicerat.

Ad

Ad eruditionem quod attinet, & in rebus gerendis experientiam, si ea talis, qualem de semet ipse prædicat, insonare debuisset assiduè auribus illud Apostolicum: *Noli altum sapere, sed time me.* & rursus: *Voluntariè peccantibus post acceptam notitiam veritatis, iam non relinquitur pro peccatis hostia: terribilis autem quadam expectatio iudicij, & ignis emulatio, quæ consumptura est aduersarios.* Nihil æquè familiare his qui Ecclesiæ gremio suâ sponte excidunt, ac præsumptio & tumor mentis. hæc apostatarū omnium notissima est nota, quam nouitius hic fœtus passim etiam sibi vendicat, dum intrare contendit, vbi alios cecidisse videt: nec se eripit procellis, quæ tam multos obruerunt. Sunt enim vastissima diuinorum eloquiorum æquora, quibus se nullo duce aut præpete immergunt omnes, imò irruunt, & sine præceptore, quod in Honorato grauitè reprehendit S. Augustinus, *audent ferre sententiam.* Cùm ta-

Rom. 12.

Heb. 10.

De vtilit.

credendi

cap. 7.

Traet 18.  
in Ioan.

men, eodem teste, *non aliunde emer-  
serunt dogmata peruersitatis illaqueantia  
animas, nisi dum Scripturae bonae intelli-  
guntur non benè; & quod in eis non benè  
intelligitur, etiam temerè & audaciter asse-  
ritur.* Huius autem temeritatis & auda-  
ciæ architectus est proprius spiritus,  
quem quisque sibi affingit: cuius igni-  
culos sensisse se fatetur, etiam prius-  
quam in Theologiæ studio adolesce-  
ret, (quod tamen numquam in eo eue-  
nisse, nuperum scriptum longè à genui-  
no Theologiæ sensu alienum loquitur)  
fugax Archiepiscopus. Debueras, &  
etiâ munum debes, da veniam si te com-  
pello, *captiuare Intellectum in obsequium  
Christi.* Nempe totius Religionis funda-  
mentum est obedientia; *veraque Reli-  
gio, vt eleganter Tertullianus, dubitabi-  
lis non est, imò nec disputabilis. Sola hære-  
sis obedientiam tollit, & quidquid animo  
errante cum superbiâ vel tumore cogitando  
imaginata fuerit, religionis nomine obser-  
uat.* Quod de suo tempore S. Hilarius  
scri-

In Præ-  
script.

scripsit, idem nobis hoc ipso sentire liceat, tot scilicet *nunc fides existere, quot Lib. ad Constant. Imp.*  
*Voluntates: tot nobis doctrinas esse, quot*  
*mores. quasi extra Ecclesiam illius director spiritus inueniatur, cum qui seipsos*  
*segregant, Spiritum Dei non habeant. unde*  
*Augustinus: Nihil sic debet formidare*  
*Christianus, quam separari à corpore Christi.*  
*Quia qui separatur à corpore Christi,*  
*non est membrum eius: si non est membrum*  
*eius, non vegetatur Spiritu eius. Quisquis*  
*autem, inquit Apostolus, Spiritum Christi*  
*non habet, hic non est eius.* *In Euan- gel. Ioan. Tract. 27. Rom. 8.*

Certè vel vnicum hoc eruditissimi eiusdem Doctoris pronuntiātū, quod paulò antè adduximus, in tuā defectiōne nos omnes solatur; *Ex his hominibus Lib. de hæreticos (& apostatas) fieri, qui etiam- vera Relig. cap 8.*  
*si essent in Ecclesiā, nihilominus perirent.*  
 Non ergo quòd inter bonos benè enutritus, ——— fronte politā

*Astutam vapida seruas sub pectore vulpem,*

quæ Christianos pullos sollicitæ Matris

alis excutiat : non quòd è Rhetorum  
 scholis verbosus prodieris Sophista :  
 non quòd Mathematicas disciplinas  
 cum applausu professus à salutis trami-  
 te deuies, & vt tecum deuiant tuæ fari-  
 næ plerique, ad labores : nec quòd Epi-  
 scopus & Pastor, cuius erat, exemplo  
 vnici Pastoris animam pro ouibus po-  
 nere, & anathema esse pro fratribus  
 cum Doctore Gentium, creditum tibi  
 gregem clanculùm malè tibi conscius  
 derelinquis, & senectutis tuæ veren-  
 dam canitiem plumcâ leuitate cõspur-  
 cas; quidquam mutationis in Catholi-  
 corum pectoribus intulit, aut quem-  
 quam à constantiâ dimouit : quin po-  
 tiùs ruina tua nos docet, neminem sic  
 de perfectione suâ esse securum, quem

1. Cor. 10. non deceat esse de casu sollicitum. *Qui  
 se existimat stare, videat ne cadat*, monet  
 B. Apostolus. *Assumendi sunt magnorum  
 virorum lapsus, vt se nequaquam rectè suis  
 factis iactare quis audeat*, inquit inter alia  
 Christianæ doctrinæ præcepta Augu-  
 stinus,

stinus, cum videat tantorum virorum & cauendas tempestates, & flenda naufragia. Ad hoc peccata illorum hominum (agit autem de Saule, Salomone, Origene, Tertulliano, &c. qui velut duces tui naufragij, vt tandem securitatis oram portumque ineas, viam aperiunt) sunt scripta, vt Apostolica illa sententia vbique tremenda sit, quâ ait: Quapropter qui videtur stare, videat ne cadat. Euolue monumenta antiquitatis, & reperiēs Arrianam hæresim ita olim vniuersum orbem occupasse, vt scribat B. Hieronymus, totum orbem ingemuisse, & se Dial. ad- uers. Luciferian. Arrianum miratum esse. Paucissimi toto Oriente Episcopi qui Catholicam fidem assererent, & ij quidem sedibus pulsi, proscripti, profligati. Quid igitur moueat aut teneat Ecclesiæ filios, si hæc etiam ætate à nobis, in quos fines seculorum deueniunt, Episcopus abeat? & Æsopici serpentis instar assurgat in sinum qui eum excepit, enutrit, fouit? Abierit sanè ille in consilio impiorum,

abiit ante eum vniuersus pænè Oriens  
 sæculis prioribus : & hoc nostro etiam,  
 manifesta adhuc muliebris rotæ vesti-  
 gia cernimus, quæ Gebhardû Thru-  
 chesium Coloniensium Metropolitam  
 augustissimo Ecclesiæ candelabro præ-  
 cipitem egit. quâ tamen tempestate  
 nullus fluctuauit, quem Christianæ  
 petrae immobilis firmitas solidauerat.  
 Sciunt Catholici, in Ecclesiâ Christi  
 sessurum Antichristum : non ignorant  
 surrecturos pseudopphetas & pseu-  
 dochristos, *qui seducent multos, & in  
 errorem ducent, si fieri potest, etiam ele-  
 ctos. In nouissimis diebus discedent qui-*  
*dam à fide*, inquit D. Paulus, *inten-*  
*dentes spiritibus erroris, & doctrinis*  
*demoniorum, in hypocrisi loquentes men-*  
*dacium, & cauteriatam*, nempe ob in-  
 famis vitæ dedecora, & peruersæ volun-  
 tatis mutabilitatem, *habentes conscien-*  
*tiam*. Nusquam autem noui Prophete,  
 Doctores, Reformatores prædicuntur,  
 sed pseudopphetæ, illusores, magistri  
 erro-

1. Tim. 4.



erroris, *homines seipsos amantes, cupidi, elati, superbi, blasphemi, parentibus* (quo nomine Superiores legitimos accipimus) *non obediētes, ingrati, scelesti, sine affectione, &c.* Itaque tantum abest ut emortuam, vel latentem veritatem, quod facturum te polliceris, ad lucem proferas, schismatumque extinguendorum & unitatis Ecclesiasticæ resarciendæ iter comunias, ut potius eam per verborum pugnas depraves & obnubiles, atque Herodianâ malitiâ nascentem Religionē necdum satis adultis pectoribus euellas, & proteras, omnemque ad fidei viuitatem aditum præcludas. Verum quemadmodum illustrius ab igne aurum exit, ita ab erroribus veritas: cui eam vim inesse sentit Hilarius, ut cum per se intelligi non possit, *per ea ipsa tamē quæ ei aduersantur eluceat;* *ut naturâ suâ immobilis manens, firmitatem naturæ suæ quotidie dum attentatur, acquirat.* Præclare & verè Cyprianus, quem utinam hîc etiam purgatâ aure

2. Tim. 1.

Lib. 7. de  
Trinit.

De vnitate  
Eccles.

audires! & vt Catholici omnes audiant, hortor: *Non nos moueat aut turbet, inquit, multorum nimia & abrupta perfidia, sed potiùs fidem nostram prænuntiata rei veritas corroboret: vt quoniam quidam tales esse cæperunt, quia hæc antè prædicta sunt; ita ceteri fratres ab eiusmodi caueant, quia & hæc antè prædicta sunt, instruente Domino & dicente: Vos autem cauete, ecce prædixi vobis omnia.*

Tandem à scopo ad fucum & phaleras quibus mutationem suam adornat *M. Antonius*, dirigendus est calamus. & quoniam ad veterum Ecclesiæ Doctorum, omissis turbidis riuulis, limpidissimos fontes me ducit, quos tardiùs & in hoc ætatis delirio, vix antè libatos, degustassè se, (cuius haud alium testem inquirimus, præter ipsam scriptionem quam expugnamus) affirmat, non propriè mea, leuiaque proponam, sed quæ ab iisdem ipsis nonnumquam, dum ab occupationibus ferior, hausi: quorum luce caligo omnis,

nis, & errorum nubes deterfa veritati  
 victas manus dabit, & inclamabit il-  
 lud Esdræ: *Magna est veritas, & praua-* Lib. 3. c. 3  
*let.* Solent qui amara propinant, melle  
 poculum illinere: & vt pisces fallat, ha-  
 mo escam piscator occultat: ad eum  
 modum istē, vt imperitos illaqueet,  
 adfert quæ lectorem demulceant. quip-  
 pe curiosum genus hominum auidē se  
 extendit ad aliena & noua. vnde non in-  
 utiliter, libros omnes qui doctrinam re-  
 ceptæ aliās ab Ecclesiā doctrinæ aduer-  
 santem tradunt, tanto rigore diligen-  
 tiaque Catholicorum manibus excu-  
 tiendos Summi Pontifices censuerunt,  
 ne dum incauti latentia venena non vi-  
 dent, falsitatem imbibant, quam mox  
 propositā vitæ licentiā numquam euo-  
 mant. Et hæc vna res tot Conciliorum  
 decretis stabilita, tot Pontificum au-  
 thoritate fulta, huic ad fugam ab Ec-  
 clesiā capeffendam, portam aperuit, su-  
 spicionem mouit, auxit, quod talium  
 librorum copia sibi etiam post peracta,  
 vt

vt scribit, plenè Theologica studia, & assumptos in iis gradus, post promotionem ad Episcopatum, non permitteretur. Quæ verò est ea temeritas, vt quod à primæuo tempore à beatissimis Patribus constitutum est, vnus homo blasphemare, proicere, ac sufflare præsumat, dentesque acuire in receptissima Ecclesiæ decreta? Arrianorum scriptas insanias ne quis legeret, non modò vetuit, sed ignibus insuper tradi iussit Synodus Nicæna, auctore Nicephoro. Cui sententiæ ita promptè subscripsit Magnus Orientis Imperator Constantinus, vt eos qui obsisterent, librosque à Concilio vetitos occultarent, extremo supplicio damnarit. Etiam Marcelinum Ancyranum, quòd excitatæ à se hæresis compendia in volumen redacta, Vulcano ceu victimam offerre abnueret, capitis condemnatum memorat Socrates. Sunt namque omnes hæreticorum libri, iudicio Gregorij Nazianzeni, *tamquam aspidum oua, aspidas*

Lib. 8.  
cap. 18.

Lib. 1.  
cap. 14.  
Orat. 2.  
de Fide.

& basiliscos procreare nata. qui vbi cùm indefesso studio fuerint perlecti, nihil præter inanem sonum & sermonis strepitum, imbremque errorum eructant: dumque aures modulatione promissæ libertatis capiunt, pectoris interna plerumque deuinciunt. Hinc Ethnici, na- Philostr. in Sophis. turâ duce, Protagoræ athei libros pu- Liuius lib. 10. blico foro exussere, alios Religionem eneruantes, Romani & Lacedæmones; quòd per copiam blandientis eloquentiæ sensum irrepere nocentis doctrinæ cœnum intelligerent. Liceat mihi vsurpare hoc loco illud Maronis,

*Qui legitis flores, & humi nascentia  
fraga,*

*Frigidus, ô pueri fugite hinc, latet an-  
guis in herbâ.*

& ita facere conuenit omnem illum, qui tamquam paruulus Ecclesiam Matrem agnoscit. Non est cuiusuis è mediis spinis rosam carpere, aut inter adulterina metalla segregare quod purius est; sed eorum, qui, vt Apostolus lo- Hebr. 5. qui-

quitur, *exercitados habent sensus ad discretionem boni & mali*. Præsumptuosi tumoris soboles est, velle in luto quærere puritatem, & incalceatum per spineta sine læsione incedere, atque *desiderare de cibis illius* (quod ne committamus vetat Sapiens) *in quo est panis*, hoc est doctrina, mendacij, & non decipi.

Epist. 93. Benè D. Leo: *Nemo hoc impunè præsumat, nec inter Catholicos censeatur, quisquis scripturis utitur ab Ecclesiâ Catholicâ damnatis*. Quæ ergo tua vanitas & elatio est, *Marce Antoni*, quòd vnde alij firmitatem & prudentiam, inde tu iniquam suspicionem augeas, & infirmitatis tuæ fulcimen accumules? Doces memorabili exemplo, quod non sine animi dolore à te memor posteritas per manus tradet, quàm perniciofa sint hæresium semina libris insparfa, vt quæ tam mortifero veneno sensim affectum tuum imbuerunt, vt velut nouâ libidine incensus ea appetiueris, quæ priùs ceu monstra quædam è medio Erebo  
pro-

prognata auersabaris; vinoque erroris  
 quod in iis propinatur ebrius, ad noua  
 dogmata te conuerteris, atq; ex magi-  
 stro veritatis, tandem euaseris discipu-  
 lus erroris. Vtilius tibi fuerat illorum  
 scriptis animum intendere, quorum le-  
 ctione nutans tua instabilitas iustitiæ  
 ac virtutum incrementum accepisset.  
 Didicisses profectò ex his, qualem o-  
 porteat esse Episcopum: nempe *irre-  
 prehensibilem*, hoc est quem non modò  
 culpa non inquinat, sed virtus exornat:  
*sobrium*, quia cùm Dominici gregis  
 speculator constitutus sit, agnoscere de-  
 bet vultum pecoris sui, ouiumque sa-  
 luti indefessâ curâ inuigilare; quod  
 ventri deditus numquam præstiterit:  
*ornatum*, quem conueniat (vt nominis  
 huius etymon Cicero exponit) deco-  
 rum seruare in motu, inaccessu, habitu,  
 & sermone: *pudicum*, *Doctorem*, *mo-  
 destum*; & nonnulla his affinia, de qui-  
 bus Timotheum suum instruit Gen-  
 tium Doctor. Intellexisses vitium in  
 Epi-

In Apol. Episcopo reputare Nazianzenum, *non quàm optimum esse*: tantamque in eo virtutis gloriã requirere Chrysostomum, *ut instar solis, ceteros velut stellæ suo fulgore obscuret*. Expressisses in te veri Præsulis normam, quam Eugenio Pontifici olim mellifluus Bernardus præscripserat; & considerasses (verba illius adducam) *oportere te esse formam iustitiæ, sanctimonie speculum, pietatis exemplar, assertorem veritatis, Fidei defensorem, Christianorum ducem, Pastorem plebium, Magistrum insipientium, salem terræ, orbis lumen, &c.* Eduxissent te ceu Abrahæ filium de Vr Chaldæorum illi ipsi, & meliori fide doctrinam & negotia Christi obire, quæ eminens solùm perspexeras, docuissent. Vidisses in eis ceu speculo quodam polito corruptos tuos mores, quorum consideratio magnos plerosque viros movit, ut defectionis secutæ foetorem præsentirent, & non rarò sub verborum inuolucris impendentem tibi ruinam suggererent. Denique



niſque ſine offendiculo, & velut ad lucidiſſimam faciem perſpexiſſes, quòd non diuini, ſed nequitiaſ ſpiritus impulſu vehementiore terram tuam exire iuſſus, non veritati, ſed mendacio; non Deo, ſed carni, mundo, ſatanæ obſecutus, eò nauigium appuleris, vbi certum ſaluti tuæ naufragium, ni ocyùs emerſeris, expectandum. Verùm quemadmodum febricitantes circa ciborum ſapores naſcant, & imperiti pictores excellentius prototypon non imitantur, ſed in tabulâ deturpant, falſaſque imagine repræſentant: haud diſpari ratione Spalatenſis Præſul, infecto mentis palato, diuinarum Scripturarum mella deguſtauit, & ex his Patriarcharum principem Abraham cordis ſui tabulâ, fallaci ſpiritus priuati penicillo exprimendum propoſuit.

Ea apoſtatarum modeſtia eſt, vt de Dei Spiritu, qui extra Eccleſiam ſit, glorientur omnes, & non niſi cum illis ſe hominibus audenter conferant, *quo-* Eccli. 44.

*rum memoria in benedictione est, qui que in generationibus gentis suæ gloriā adepti sunt, & in diebus suis habiti sunt in laudibus.*

Abrahæ filiis opera Abrahæ Dei Filius commendat: quæ quâ animi promptitudine, ac melioris cōversationis exemplo, aliis imitanda proposuerit personatus hic & rediuius Abraham, factâ ad inuicem vitæ morumque collatio-

Ephes. 4 ne, facili negotio innotescet. *Abraham multitudinis gentium* apud Ecclesiasticum, *& credentium omnium pater* Apostolico præconio celebratur; cū quod omnibus illustre fidei exemplum proposuerit, tum quod promissam à Deo benedictionem, posteritatis nomine primus acceptauerit. Non perinde nouitius hic Abraham: qui, ne credentium multitudinem in Christo Iesu per Euangelium gigneret, quos prius congregauerat, disperfit: nè vltra filios Ecclesiæ, cui pridem erat desponsatus, pareret, malignantium synagogam complexus, quasi ad alex iactum, desulto-

fultoriâ leuitate, mansa prius & reman-  
 sa rerum sacrarum dogmata ad plau-  
 sum pompamque composuit: dumque  
 alienis auriculis escas colligit, *dilexit*, Psal. 108.  
 iuxta Regij Psaltis vaticinium, *maledi-*  
*ctionem*, & *veniet ei: noluit benedictio-*  
*nem*, & *elongabitur ab eo*. Abrahæ simi-  
 lis inuentus est nemo, *qui legem Excelsi*  
*seruaret*. Nec similem huic Antistitem  
 ætas parentum & nostra tulit, qui post  
 tot felicia Religionis incunabula, post  
 tam varias functiones pro domo Dei  
 obitas, post tot promissa Deo teste fir-  
 mata, Excelsi legem eâdem annorum  
 maturitate violaret, dum Ecclesiæ de-  
 creta irruenter contemnit, in cuius  
 sinu educari conuenit omnes, qui adul-  
 tam gloriæ hereditatem aucupantur:  
 quam qui docentem despexerit, fidei  
 lucernam se abiecis-  
 se demonstra-  
 uerit.  
*Ecclesiæ iudicium*, docet eruditè Thomas  
 V Valdensis, *sequi debet Lector Christia-*  
*nus sub pœnâ perfidiæ, si ad fidem res per-*  
*tinet; sub pœnâ contumaciæ, si non pertinet.*

Lib. 2 Fi-  
 dei doct.  
 c. 21. & 23

*Abraham in tentatione inuentus est fidelis.*

Non ita reformatus noster Abraham.

1. Tim. 5. Audiat vas electionis Paulum: *Qui suorum, & maximè domesticorum curam non habet, fidem negauit, & est infideli deterior.* Occupauit illum ab hinc decennium apprehensa tentatio, & sollicitatus ab interno spiritu ad schismata, idola, luxum & Venerem, cur cum Abraham fidei scutum non opposuit? cur gladium spiritus non strinxit? cur salutis galeam non induit, & ignea nequissimi tela extinxit? Perceperat iam aliquamdiu ancillam Agar cum suo Ismaële graui conflictu altercantem, carnem scilicet aduersus spiritum assurgentem; cur blandientis lenocinia in ipsas medullas admisit, & velut sal infatuatum se hominibus conculcandum præbuit? Esto, tentauerit illum præstantioris spiritus impulsu Deus, vt modicum afflictus inuariis experimentis exultaret dignus Deo, qui non patietur nos tentari supra id quod possumus, sed facit

1. Cor. 10. *tis exultaret dignus Deo, qui non patietur nos tentari supra id quod possumus, sed*

*facit*

*facit etiam cum tentatione prouentum; quò  
 scilicet tentatio adeò non obsit, quin  
 cedat potius in virtutis & gloriæ aug-  
 mentum, viamque ad illas commu-  
 niat, ut possimus sustinere. Quem autem  
 prouentum & fidem in Spalatenſi Ar-  
 chiepiscopo tentatio fuerit operata, lip-  
 pis & tonsoribus notum est. Redeo  
 ad Abraham. Hunc omnium per præpu- Rom. 4.  
 tium credentiũ patrem Paulus facit, quòd  
 in Gentilibus illustre fidei exemplum,  
 ac sæculorum memoriã dignum tro-  
 phæum statuerit : Spalatenſis Abra-  
 ham, vera inconstantia idea, pernicio-  
 so subdolæ defectionis exemplo, men-  
 dacis turbæ Babylonicæ pater, fautor,  
 cultorque existit. Ad extremum, Abra-  
 ham de terrâ natiuitatis egressus, domo,  
 agnatis, fortunis omnibus relictis, in  
 eam regionem secessit, quam qui ut in-  
 grederetur iusserat, demonstraret: Dei-  
 que iussioni, nullâ interpositâ morâ, est  
 obsecutus. In isto longè aliter se res ha-  
 bet. Nulla hîc aut lex quæ pristinam*

illi dignitatem excuteret ; aut è cælo delata iussio , quæ in aliam regionem mitteret. Exiit cum Primatus honore non vanus durioris sententiæ timor: tumor aliò excussit, & prehensa securitas in eum locum transtulit, vbi Catholica veritas sub modio hætenus delitescens, in Ecclesiæ candelabro non luccet ; & in quo, promissionis Abraham factæ spem in semet transferens, Primatum insuper aliquê vel solo perfidiæ patrociniò infallibili euentu affulsurum sperat. Quo fine, vt blandiente osculo Dominum prodat, eiusque sponsam

Eccli. 19. lenonibus mille prostituat, *nequiter se humiliat*, (nihil enim præter summam charitatem pollicitationum minarumque crepidine intextam eructat, eximiam illam quæ Doctorem Gentium Deo commendauit, animi submissiorem, & in ministerio quod acceperat sollicitudinem in se transumens,) & *interiora eius plena sunt dolo*. Etenim sub amabili veritatis asserendæ pigmento

virus

virus propinat, quò eam propriâ man-  
 sione proſcribat, dum Romæ nouos  
 aliquot Vulcanos comminiscitur, qui  
 per ſummam vim innumeros fidei ar-  
 tículos cudant, manifeſtam falſitatem  
 continentes, qualem eſſe ait, eumque  
 velut ab igne recens natum, Catholi-  
 cam Eccleſiam ipſam Romanam Cur-  
 riam intelligi, atque in eâ ſolâ, imò in  
 ſolo Papâ totum Chriſti Spiritum reſi-  
 dere. Inueterate ſenex, *numquid Deus* Iob 1 3;  
*indiget mendacio tuo, vt pro illo loquaris*  
*dolos? Non decent ſtultum verba compoſita,* Prou. 17.  
*nec duorum regnorum, Croatię & Dal-*  
*matix quondam, mox etiam magnæ*  
*Britanniæ ( ni ſpe ſuâ excidat ) Prima-*  
*tem, & Principem, labium mentiens.* Quis  
 hætenus in Eccleſiâ ſpiritus, præter  
 eum qui ex propriis loquitur, hunc ar-  
 ticulum vt abs te aſſeritur, firmâ fide  
 credendum propoſuit? quando, ubi,  
 per quẽ fabricatus? eſſare ni erubeſcis,  
 plurima illa quæ te præcone ad ſolam  
 Curiam Romanam per ſummam vim

& iniuriam Ecclesię pertrahuntur, quorum nullam à Christo institutionem habuimus, & quibus animæ fidelium miserabiliter decipiuntur. Quis te præter Ecclesiam audiens, eam à Romano Pontifice turbari, scandalizari, opprimi aut sensit, aut scripsit? Quis doctrinam illius, tamquam quæ à recto tramite deuiet ( te oculatissimum Argum excipio ) ita planè perspexit? Quis, nisi impurus, tam insulsi oris, vt Babylonis eam nomine obscurer, quę instar ciuitatis ordinatissimæ supra montem positæ abscondi non potest, & aduersus quam ne inferorum quidem portas, quorum fortassis tibi nunc demandata est custodia, præualituras Christus prædixit? Quis verò veterum Catholicorum, quos erroris tui duces impiè proponis, Episcopum particularem primo Ecclesiæ Pastori parem facultate, auctoritate, dignitate constituit? nisi quòd tu catellus omnium minimus, ( verum namque de temetipso confiteri veritas ipsa cogit )



git) incondito latratu fuscites infernales hos molossos, multis sæculis olim veritatis antidoto sopitos, qui gregem Dominicum lacerent, & luporum rapacitati deuorandum suminâ contentione comittant. Et quidem nō ferenda siue impudentia, seu inscitia tua est, quòd D. Cyprianum insani erroris tui socium obtrudis & ductorem, quasi illo præcurrente in hāc Charybdim incideris, quòd is se cūm Stephano Episcopo Romano gubernandæ Ecclesiæ librā tenere edixerit, & Episcopum Episcoporū non agnouerit. Exclamem & meritò,

*Speculatum admisi risum teneatis amici?*

Proposuisses utinam B. Cyprianum, normam; regulam, & exemplar ad imitandum! quomodo eum toti Ecclesiæ proponere S. Augustinum ex fide affirmas; euitasses exemplo Cypriani, proprii spiritus fallax decretum, & ad petram Ecclesiæ paruulos, hoc est insensatos adfectus tuos, allisisses. Tenuisses illius impulsu libram Ecclesiæ

C 5 cum

42 EXAMEN PROFECTIONIS  
cum Romano Pontifice : at non foris.

1. Cor. 5. *Quid enim mihi, inquit Apostolus, de  
iis qui foris sunt iudicare ? sed in ipsâ Ec-  
clesiâ, cuius auctoritas est arx fidei ;  
vox verò docentis, regula veritatis.*

Matth. 18 *quam qui non audierit, sit tibi sicut Ethni-  
cus et publicanus.* Didicisses Cypriani  
in adstruendâ sententiâ si quam conce-  
peris à communi Ecclesiæ sensu, mo-  
destiam, & reuerentiam erga Roma-  
num Episcopum ; quem Episcopum  
Episcoporum familiari nomine appel-  
lari, ex magistro suo Tertulliano non  
ignorabat. Vnde impudenter admo-  
dum illius auctoritatem ceu quamdam  
Ægida summi Pontificis regimini Mo-  
narchico opponis ; & solium tuum,  
æmulatus Luciferi prauitatem, super  
astra, hoc est reliquos Ecclesiæ Præla-  
tos exaltare, atque Altissimo Præsuli si-  
milis fieri contendis. Caue ne grauis il-  
la Isaïæ comminatio etiam te feriat ;  
solet enim delicti paritatem supplicij  
Isaïæ 14. par atrocitas consequi : *Verumtamen ad  
infer-*

*infernum detrahêris in profundum laci. Qui te viderint, ad te inclinabuntur, teque prospicient. Numquid iste est vir qui conturbavit terram? terram inquam fidelium, Ecclesiam: qui concussit regna Dalmatiae & Croatiae? qui posuit orbem gregem sibi creditum, desertum sine duce, pastore, magistro?*

Certè quàm temerè in Patrum monumenta irruas, vnus hic B. Cypriani locus tam infeliciter ex Donatistarum suggestione tractatus, tibi quidem saniora consilia capeffenti, aliis verò apud quos eruditionem tuam omnigenam velut nouus histrio in theatrum adduxisti, documento esse poterit. Ad B. Augustinum longè præclariùs de D. Cypriano sentientem, eiusque verba perpendentem, certiori pede eundem tibi fuerat. Præbuiſſet ille ad singula B. Præſulis verba singula etiam antidota, & iudicij in rebus fidei libertatem, quam Episcopis ab eo concessam gloriaris, plenè didicisses. Ac primum illud

Lib. 3. c. 3  
de Bapt.  
cont. Donatistas.

lud quod *de Episcopo Episcoporum* dixit  
 Cyprianus, ad modestiam illius refert  
 Augustinus, quod tu ad fastum, & sin-  
 gularem prærogatiuam. Cùm enim ille  
 Carthaginensis esset Metropoli-  
 ta, aliis seu suæ seu alterius prouinciæ Episco-  
 pis præiudicare noluit. ait enim ad ea  
 verba Augustinus : *Quid mansuetius,*  
*quid humilius ?* Illud verò *de libertate*  
*Episcoporum iniudicando*, ad illas quæ-  
 stiones doctissimus Pater restringit,  
*quæ nondum eliquatissimâ perspectione*  
*discussæ sunt.* & addit : *Nouerat enim*  
*quantam Sacramenti profunditatem tunc*  
*omnis Ecclesia variâ disputatione versabat,*  
*liberumque faciebat quærendi arbitrium,*  
*vt examinata veritas panderetur.* Eliqua-  
 tissimam autem perspectionem, prius-  
 quam Episcopis libertas nimium abun-  
 dandi in sensu suo indulgetur, intelli-  
 git vniuersæ Ecclesiæ concordissimam  
 auctoritatem, seu plenarij Concilij de-  
 finitionem, cui sine dubio cessurum  
 fuisse Cyprianum, prout omnem Ec-  
 clesiæ

clesiæ filium & sobriè sapientem cedere conuenit, palàm affirmat. Illud ergo vnum te considerare oportuit, quod etiam Donatistis idem Augustinus considerandum exhibuit: *Si auctoritas Cypriani sequenda est, magis eam sequendam in vnitatem seruandâ, quàm in Ecclesiæ consuetudine mutandâ.* Iam verò tam ea quæ decem voluminibus adhuc parturis opinionum portenta, quàm quæ in profectiois tuæ consilio enixus es, eliquatissimâ veritatis perspectione, Conciliorumq; auctoritate olim compressa, definita, excussa. sic vt asserta per Cyprianum iudicandi libertas, nec tibi, pacetuâ dixerim, neque inferiori Episcopo valeat patrocinari, cùm eam ad illud tempus B. Augustinus referri doceat, *in quo quæ ab illis (Episcopos puta) tractabantur, nondum declarata sine ambiguitate hauriebantur, sed adhuc clausa magno molimine querebantur.* Quod sanè de hac nostrâ ætate dici nullâ ratione poterit, quâ, si aliàs vnamquam,

Suprà  
lib. 6. c. 7.

quam, eliquata, & iudicio Ecclesiæ terminata quæuis Fidei controuersa habemus; in quibus sententiam propriam, vti facit Archiepiscopus Spalatensis, præcipitare, summæ temeritatis & indomitæ insanix est.

Et quoniam ad veterum Ecclesiæ Doctorum testimonia calamum euocauit, sequar libens præeuntem; non tamen, vt in Cypriano ille facit, obliquo, sed directo tramite. nam veluti in eodem prato bos herbam quærit, canis leporem, ciconia lacertam: ita ex iisdem siue Scripturarum siue Patrum testimoniis firmatur à Catholico lectore veritas, quam in sensu suo nimum abundans apostata, hæreticus, vel schismaticus infirmabit, quassabitque. Cuius quidem rei causam arbitror, quam in seipso iuvene eloquentiæ & Philosophiæ cognitione inflato reprehendit S. Augustinus, præsumptionem & superelatum sensum, qui primi hominis lapsum & humani generis ruinam attulit.

Lib. 3.  
Conf. c. 5

tulit. Nam illa, inquit, Scripturam intelligens, erat quæ crescebat cum paruulis. Sed ego indignabar esse paruulus, & fastu turgidus mihi grandis esse videbar. hinc enim in Scripturis diuinis, quæ paruulorum pedibus lucerna sunt, nihil videbat, neque intrare ad eas poterat. Deprehendebat namq; in iis rem non compertam superbis, neque nudatam pueris, sed incessu humilem, successu excelsum, & velatam mysteriis. Ipsi etiam sancti Patres verecundè & discretè adeundi. quædam enim dogmaticè, nonnulla in contentione & certamine ab iis scribuntur: quorum ambiguitas si qua emergit, non vnius alicuius, sed Ecclesiæ auctoritate tollitur; quâ velut illustri & certo medio veritas ex ipsis fontibus elicitur, & sine quâ Fontium nomen ad falsitatis perfugium simulatè rapitur.

Quòd verò seriùs ad hos sanctorum Patrum fontes accesserit, eorumque lectione pro regimine tam suo quàm suo-

suorum cœperit in vitæ coronide delectari *M. Antonius*, nemo Catholicorum miratur. quin indignamur potius, quòd contra Apostolicum consilium Deo militans adeò negotiis se implicarit sæcularibus, vt Ecclesiæ magistros & Pastores, qui, vt loquitur Irenæus,

Li. 4. c. 43 *cum Episcopatus successione acceperunt charisma certum veritatis*, neglexerit.

Quo factum, vt sacrorum studiorum intelligentiam, quòd longè aliter Basilium & Gregorium Nazianzenū præ-

Lib. 2. c. 9 stitisse memorat Ruffinus, non ex maiorum scriptis & auctoritate, sed ex propriâ præsumptione hauserit, cam-  
que nunc sine patre aut teste, ad nouitios aliquot, quos ceu fungos vna ignorantia nox peperit, transmittere festi-

Lib. 2. de  
Theolog. nect. *Nobis satis superque est*, vt cum Nazianzeno loquar, quòd nemo ex his qui diuino numine fuere afflati, ex Patribus illis & magistris nostris, hanc illius de Ecclesiæ Monarchiâ, & deliquio in rebus fidei, Pontificis primatu, Episcoporum præ-



prærogatiuâ, hæreticorum conuenticulis, Regum auctoritate, *sententiam hætenus vel pronuntiauit, vel pronuntiatam approbavit*. Itaq; *sequentes*, cum B. Athanasio, *sanctorum Patrum confessiones, quas loquente in eis Spiritu sancto protulerunt, & intentioni eorum æquis vestigiis inhærentes*, profiteamur Ecclesiam Romanam eam esse, extra quam neque fides, neque veritas, neque Spiritus Dei, neque Scriptura, neque salus ipsa reperitur: adeoque veram Ecclesiam, vel Protestantium confessione cēseri. Cum enim illi Baptismum hætenus legitimè apud Catholicos ministratum fateantur; & consequenter doceant, eum non nisi per legitimos veræ Ecclesiæ ministros legitimè conferri, erit Romana Ecclesia ipsorum testimonio vera Ecclesia; eaque, quia plures Christus non habet, vnica, Catholica, & Apostolica: neque enim Ecclesia fuerit, quæ his notis non illustratur. Hæc est, eaque sola, in quâ Prophetiæ veteres impletæ,

In epist.  
ad Syn.  
Nicæn.

D

in

in quâ omnium gentium communio, Episcoporum perpetua successio, & indeficiens fidei propagatio conseruatioque existit. huius auctoritatē hæreses quæcumque damnatæ: hæc Episcopos omnes totius orbis certissimo successionis ordine confirmat: huius singularis prærogatiua est, non posse errare in fide, vt cuius petra immobilis est ea ipsa, quam nulla persecutionis tempestas, nulla hæresium portenta hætenus labefactarunt. Hanc B. Petro primum, & per Petrum legitimâ successionē eandem dignitatem obtinenti, Christus regendam pascendamq; commisit. Ille factus Ecclesiæ petra, dicente

Matth. 16 Domino, *Tu es Petrus*; eiusque nominis etymon exponens, addit, *Et super hanc petram*, id est, te ô Petre, *ædificabo Ecclesiam meam*. Ædificatur autem Ecclesia, dum vel collecta pascitur, docetur, regitur; vel docenda & pascenda colligitur. Et quamuis in hoc genere ædificandi, ceteri Apostoli, vt post illorum

M. ANTONII DE DOMINIS. 51

lorum tempora inferiores Episcopi & Pastores, operarii sint & sapientes architecti, præcipuus tamen paterfamilias agnoscitur Petrus: ceteri columnæ, Petrus fundamentum est cui illi inniuntur.

Quæ omnia luculentissimè ex fontibus Scripturæ & Patrum ad quos provocat, degustare potuit Archiepiscopus Spalatensis, si in quo hauriret attulisset. Quod ipsum etiam nō aliunde quàm ab ipsis fontibus petendum fuit, è quibus vnus B. Athanasius sub finem libri quem De incarnati Verbi mysterio euulgavit, elegantissimo testimonio docet: *Ad Scripturarum indaginem*, quod etiam in lectione S S. Patrum momentum habet, *verumque intellectum, opus esse vitæ probæ, animo puro, & virtute quæ secundum Christum est.* & subdit: *Nam sine purâ mente & Sanctorum imitatione, nemo comprehenderit Sanctorum verba.* Hoc apparatu ad ipsas fontium scaturigines tibi descendendum erat, &

plenissimè inuenisses quod desiderabas. vidisses apertioribus oculis, quod tamen hæcenus vidisse te diffiteris, doctrinam illarum Ecclesiarum, si modò hoc nomen cōciliabula deprauatorum aliquot merentur, quæ à Romanæ Ecclesiæ Doctōribus ceu putida sarmenta reijciuntur, longè à verâ primitiuæ Ecclesiæ doctrinâ dissidere, meramque Antichristi synagogam in iis esse constituendam. Quæ enim prioribus sæculis circa Ecclesiæ corpus hæresis ceruicem extendit, quæ porrò diuini Spiritus gladio recisa vinq̃uam, quam noui huius æui cacangelici, præsides & patroni dissectæ illius sectæ, quam tu etiam tanto conatu nouus Britannia accola sectaris, non excitarint? Promittebant infantibus, Christianis parentibus progenitis, absq; omni Baptismo æternam salutem Pelagiani; promittunt & Nouatores. Apud Manichæos salutare Baptismatis lauacrum inutile habebatur, arbitrij eneruabatur libertas; inuitabilis

tabilis peccati fomes, qui scintillas & flammam efflaret, assidue in homine accendebatur; & summa illa æternaque bonitas Deus scelerum quorumvis pronuntiabatur architectus: nonne similia his monstra diu antè posstrata, soloque illisa suscitauit, & in orbem reuexit subdolus animarum venator Calvinus, & ante eum pleraque excucullatus Lutherus? Et vt omittam alios; quid Donatum tam numerosam multitudinem sub rebellionis perfidæ signis educere coëgit, quid Græcos ante annos pænè sexcentos, Romanæ Ecclesiæ iussa contemnere, quàm euenti, ei que paucissimi abusus, Clero & Romanæ Ecclesiæ (siue verè seu falsò) adscripti? Eadem res nostri temporis apostatas à Clero & Ecclesiâ nefario schismate seiunxit, & maiori scelerum catenâ irretiuit, dum iudicio illius contempto, voce damnatâ, auctoritate conculcatâ, nouum indies Euangelium cudunt, & in errorum abyssum ac mille laqueos in-

D 3

cidunt;

cidunt, vitæ libertate inescati. Ette quoque votorum vincula disrumpere, & liberiore conuersationis genere frui, sanctæ Ecclesiæ ruinam quam à Romanâ Curiâ sustinet, ac Romani Papæ fastuosam maiestatem, vt vocas, tectamque & tuo splendore illustrandam veritatem, denique Catholicæ & doctrinæ & disciplinæ occasum impulsisse, facelque fugæ subdidisse audes profiteri. Nos verò è conuerso æstimamus iterum cum B. Cypriano, *bonos de Ecclesiâ discedere non posse.* & vt alio loco idem Doctor, *Licet videantur in Ecclesiâ esse zizania*, inquit, *non tamen impediri debet aut fides, aut charitas nostra; vt quoniam zizania in Ecclesiâ esse cernimus, ipsi de Ecclesiâ recedamus.* monet autem consequenter, & vt illius monitis aurem accommodes, interiore cordis adfectu hortor: *Nobis tantummodò laborandum est, vt frumentum esse possimus; vt cum cœperit frumentum horreis Dominicis condi, fructum*

Lib. De  
vitate  
Ecclesiæ.

Citat August. li. 2.  
cōt. Cre-  
sconium,  
cap. 34.

*Etum pro opere nostro & labore capiamus.*

Nónne in magnâ Ecclesiæ domo vasa hæc in honorem, & alia in contumeliâ agnoscit Vas electionis? Non rapit ventus triticum, nec arborem radicatam procella subuertit. Inanes paleæ tempestate iactantur, turbinis incurfione arbores inualidæ subuertuntur. Despumât aqua commota sordes, & purior demum post agitationem euadit. Summa laus est à constantiâ non diuelli; & inter medias vitiorum flammas constitutum non aduri. Hęc te olim sollicitum pastorem laus apud Deum & homines manebat: tui muneris erat, quod à pastoribus Israël per Ezechielem Deus exquirat, gregem tibi commissum constanter pascere; quod infirmum experiebaris, consolidare; quod ægrotum, sanare; quod confRACTUM, alligare; quod abiectum æstima-  
Ezech. cap. 34.  
 bars, educere; quod perierat, quærere. Jam verò dispersæ sunt oues Domini, eò quòd non esset Pastor, & non erat qui re-  
quire-

*quireret.* Propterea pastores à grege  
 fugientibus tremendum illud vae de-  
 nuntiatur, *Ecce ego ipse super Pastores,* in-  
 quit Deus, *requiram gregem meum de*  
*manu eorum.* Ideoque non sine ratione  
 beatum edixit Ioan. Fischerus Episco-  
 pus Roffensis illum, qui etiam de minu-  
 tissimo grege in die Domini aptè poterit re-  
 spondere. Viden' igitur quàm præposte-  
 rè de libertate nouitiâ glories, qui sa-  
 tanicis compedibus irretitus, innume-  
 ris te erroribus mancipasti. Neq; enim  
 maiorem animæ pestem censuit B. Au-  
 gustinus, quàm libertatem erroris. *Illa*  
*autem quæ sursum est Ierusalem, verè libe-*  
*ra est, quæ est mater nostra.* nempe Eccle-  
 sia Christiana per Saram veteris Testa-  
 menti adumbrata, & Synagogæ seruili  
 quâ Agar figurauit opposita, ea est quæ  
 sursum regitur, suamque in rebus cæle-  
 stibus perfectionē & conuersationem  
 collocat, spiritali pace nomine Ieru-  
 salem denotatâ abundat; & ex sterili  
 gentilitate collecta, materque filiorum  
 effe-



effecta, libertatem habet, quæ non modò vitiorum, cupiditatum, & aduersitatis ingruentis seruitutem excludat, sed quæ etiam ex charitatis radice progenita, omnem timorem foras emittat, Deoque in spiritu & veritate seruiat: cælestem paulò post libertatem, quâ omnibus tum animi tum corporis ærumnis eximatur, adeptura. quæ quidem libertas non nisi in Ecclesiâ, & apud filios illius, reperitur; de eaque tibi Ecclesiæ Pastori gaudendum erat, neque quidquam cum Apostasiâ infami commune habendum.

Ceterum à prælibatis Fōtibus longiùs digressus, ad eosdē te reuoco *Marce Antoni.* & quomodo olim à tenebris *Pelagianis* B. Augustinus, ita à nouitiis, & in cerebro tuo natis opinionibus, *ad Catholica lumina prouoco*: & quàm parcè oculos ad hos direxeris, quàm sobriè labia prolueris, luculenter demonstro. Non attingam autem illa quæ sparsim & velut in generali, sine teste, exemplo,

D 5 adeoque

adeoque fide non sanâ, de erroribus cum Sermonum Quadragesimaliumque libris insparfis, tum in disciplinæ Ecclesiasticæ regiminisque spiritualis normâ vſitatis, adduxisti. ea dumtaxat his fontibus purganda suscepi, quæ singulari spurcitie Ecclesiæ corpus inficiunt; cuius incolumitati tuendæ pro muneris etiam nostri debito omnem operam promptè impendo.

Tu igitur, si sanctorum Patrum confessioni æquis vestigiis inhærere mens fuit, cur eorum auctoritati in his in quibus nunc hallucinaris, non es obsecutus? cur sopita toties figmenta protrudis, & ne furori tuo minùs satisfactum videretur, ad blasphemiam verba componis? Clamas Romanam Ecclesiam circa fidei dogmata magistram esse incertam, mendacem, & disiectam; neque amplius Christi vineam, nisi ad inebriandum Noë plantatam, iamque per Romanos Pontifices velut constupratam. Quod si verum censes, dic sodes,

des, quæ ergo te Ecclesia peperit? quæ  
Episcopum constituit? quæ Sacerdotis  
honore auxit? Castane, an meretrix te  
enixa est? Si illa iam erat vera Ecclesia  
ante annos viginti, quando Episcopa-  
tum desiderasti, & pro hæretico haben-  
dus es, quod eius gremio te seiunxeris:  
si meretrix, spurius es, ex meretrice na-  
tus. Romanum Pontificem Ecclesiæ  
Pastorem non agnoscis: cuius ergo au-  
ctoritate Spalatensem Cathedram oc-  
cupasti? dicis enim te Episcopum in  
Ecclesiâ Christi. quænam illa? num-  
quid eam intelliges, cuius membrum  
erat Spalatensis tua, adeoque non aliam  
quàm Romanam? In hac sacerdotij  
functionem, & Episcopalis muneris  
dignitatem accepisti: hæc te fouit ab  
infantiâ, salutaribus vndis ablutum  
confirmavit, manus imposuit, honore  
auxit. Potuisses etiam reclusis serò fon-  
tibus, dummodò opportunè accessisses,  
examussim perspicere, Romanam Ec-  
clesiam eam esse, quam *columnam & fir-* Ephes. 4.  
*mamen-*

*mamentum veritatis* insigni elogio Apostolus depingit : omnesque omnium ætatum sectas, quantumcumque dissectas, ad hanc ceu Lydium lapidem allisas : omnes Ecclesiarum omnium Pastores & Doctores, quibuscumque perturbatæ Religionis difficultatibus enodandis, huius præsidium falli aut fallere nescium, postulasse. Vis ut exemplis rem illustrem? Polycarpus D. Ioannis discipulus, quæstionem de Paschate cum Aniceto Pontifice Romano ex Asiâ veniens communicabat. Huic ætate proximus Irenæus, è Galliis à Romanâ Ecclesiâ Catholicâ doctrinæ successiōnem contra sui temporis Valentianos

Lib. 3. c. 3 efflagitat. *Ad hanc enim Ecclesiam, ait, propter potentio-  
rem principalitatem, necesse  
est omnem conuenire Ecclesiam, id est, eos  
qui sunt vndique fideles.* quo quid melius, vel apertius dici potuit? In Africâ

Lib. De Tertullianus, *A Romanâ, inquit, Eccle-*  
Prescript. *siâ præstò est nobis auctoritas statuta.* Ab hac etiam auxilium non semel exposcit  
diuus

diuusCyprianus scriptis ad Cornelium  
 Pontificem litteris, & *ad Romanam Ec-* Libro 1.  
*clesiam perfidiam accessum habere non posse,* Epist. 3.  
 profitetur. Diuus etiam Ambrosius, *In* Epist. ad  
*omnibus,* ait, *Romanæ Ecclesiæ formam &* Pamma-  
*typum sequimur.* laudatq; fratrem suum  
 Satyrum, quòd in externâ regione no- Serm. De  
 luerit Sacramentis communicare, prius- obitu fra-  
 quam Episcopum percontaretur, *an* tris.  
*cum Episcopis Catholicis, id est, cum Ro-*  
*manâ Ecclesiâ conueniret.* Ad hanc D. Hie-  
 ronymus prouocat, datisque ad Dama-  
 sum Papam litteris, dicit: *Ego beatitu-*  
*dini tuæ, id est, Cathedræ Petri commu-*  
*nione consocior, super illam petram edifica-*  
*tam Ecclesiam scio. & post nonnulla: Qui*  
*tecum non colligit, dispergit: qui Christi*  
*non est, Antichristi est.* & aduersus Ruffi-  
 num: *Si Romanam fidem suam dicit, ergo* Apol. 1.  
*Catholici sumus.* Negat autem hanc fi-  
 dem M. Antonius de Dominis, dum illius  
 petram & cathedram negat; ergo diui  
 Hieronymi censurâ Catholicus non  
 est. Consociari recusat Damasi succes-  
 fori

fori Paulo V. Pontifici; ergo non Christi, sed Antichristi, B. Hieronymo est. & hoc adeò verum existimarunt veteres, ut Ricemer Gothus, qui & Arrianus, ad Ligures scribens ita colligat: *Si est Catholicus, est & Romanus*. Et hæc quidem pauca è primis priorum sæculorum fontibus pro infallibili Ecclesiæ magisterio collegisse suffecerit, ut quorum doctrinam hodie semperque perætates omnes, eadem Ecclesia amplectitur & veneratur.

Venio ad illius visibile caput Romanum Pontificem, quem collegam, comministrum, fratrem Episcoporum vocas. Annuo, si doctrinæ communionem adspicis; neque quisquā inficietur Christiana hæc nomina: si verò muneris potestatem inspicis, manifesto errore inuolueris. quem ut tandem etiam eluas, fontes recludam: sequere. Primum autem delibandos tibi propono illos, qui Romano Episcopo ceu legitimo diui Petri Apostolorum Principis successor,

fori, primatum in Ecclesiâ deferunt,  
 (*Christum namque ouium suarum curam* Lib. 2. De  
*tum Petro, tum Petri successoribus commi-* Sacerdot.  
*sisse*, disertis verbis Chrysostomus de-  
 monstrat) quorum omnium velut an-  
 tesignanū tibi iterū statuo, magnum  
 illud Africæ lumen Cyprianum. hic  
 dum vnitatem ab Apostolo commen-  
 datam expendit, dicit: *Deus vnus est, &* Lib. 1.  
*Christus vnus, & Ecclesia vna, & Cathe-* Epist. 8.  
*dra vna, supra petram Domini voce fun-*  
*data.* Dein' alio loco, & occasione, quo-  
 rumdā schismaticorum abiurationem  
 eā tempestate vsitatam recensens, hanc  
 illius formulam insinuat: *Nec ignoramus* Lib. 3.  
*vnun Deum esse, & vnun Christum Do-* Epist. 7.  
*minum, & vnun Spiritum sanctum, &*  
*vnun Episcopum in Ecclesiâ Catholicā esse*  
*debere.* Hunc autem vnum paucis antè  
 diebus professi erant, Cornelium Ro-  
 manæ Cathedræ clauo assidentem, vo-  
 cantes eum *Episcopum sanctissimæ Catho-*  
*licæ Ecclesię.* Quæ omnia iterū longè  
 vberius libro De vnitatem Ecclesię incul-  
 cat,

cat, vbi Cathedræ vnitatem probaturus, ostendit Ecclesię corpus esse vnum in Episcopatu vno, cuius à singulis in solidum pars tenetur, *et* vnitatem seruari in origine, quia vnum est caput & origo vna. Cypriano Augustinum, quo nihil doctius habuit Latina Ecclesia, iungimus, eadem luculenter asserentem. Dum namque aberrantem amicum ad Ecclesię gremium reuocat, *non esse dubitandum*, scribit alibi, *in illius Ecclesię nos condere gremio, quę ab Apostolicâ Sede* (vtique Romanâ) *per successionem Episcoporum culmen auctoritatis obtinuit.* En quomodo in Romani Pontificis successionem culmen auctoritatis constituat, addens: *Cui nolle primitias dare, vel summę profectò impietatis est, vel precipitis arrogantia.* Videat nunc Catholicus Lector, quo loco apud B. Cyprianum & Augustinum habitus fuisset nouus hic tympanotriba Spalatenfis, qui inani quadam logomachiâ Titanum temeritatem æmulatus, cælo manus inferre non veretur,



tur, ipsamque Fidei Petram oppugnare, agglomeratis inanum verborum procellis contendit, *quam utique superba non vincunt inferorum portæ*, ut ex Christi verbis desumpsit citatus Augustinus. Qui etiam aduersus Pelagianam labe infectum Iulianum differens, Innocentium Romanæ Ecclesiæ præsentem alijs Patribus annumerat: *Cum his inquit, confideat Innocentius, et si posterior tempore, prior loco.* Idem ipse quamuis Episcopus longè doctissimus, libros suos quos contra Pelagianos conscripserat, ad Bonifacium Papam mittit, & dicit: *Communis est omnibus nobis qui* Lib. I. cōt. Iulianū. *fungimur Episcopatus officio (quamuis ipse in eo præmineas celsiore fastigio) specula* Lib. I. cōt. Parmen. c. I. *pastoralis. Quid ad hæc Marce Antoni?* Augustinus affirmat in officio, curâ, & speculâ pastoralis primatum tenere Romanum Pontificem: tu verò usurpata, ficta, fastuosam, nullam illius maiestatem adseris. Augustinus etiam Episcopus scriptorum & eruditionis

E famâ

famâ celeberrimus præminentiam agnoscit celsioris fastigij : tu autem, cuius ne quidem nomen extra Dalmatiæ fines vulgatum antehac fuit, collegam te facis, & sodalem. Ignosco. necdum Fontibus labia prolueras, necdum ea cum B. Augustino tibi societas intercesserat,

Lib. 2. c. 1.  
De Bapt.  
cōt. Do-  
natist.

vt ex eo intelligeres, *Apostolatus principatum cuiuslibet Episcopatus præferendum; & quamuis distet Cathedrarum gratia, vnam tamen esse martyrij gloriam.*

Hic mecum observa Romanæ Cathedræ gratiam præminentem. Sanè in causâ fidei principatum iudicandi, docendi, definiendi tenere Romanum Pontificem, cū veteribus ipsis Catholici Imperatores ingenuè testati sunt; ad quos vt mecum progrediare, manum porrigo. Arnobius vetustissimus scriptor, *vniversa flumina in deserto huius sæculi benedici vsque hodie à Petro scribit, & ipsum esse exitum aquarum in sitim, ita vt qui foras ab Ecclesiâ Petri exierit, siti pereat.* Haud aliter Concilij Mileuitani

In Ps. 106

Patres

Patres Innocentium Pontificem compellarunt, vt Pelagianos iam Carthaginensis Concilij decreto damnatos, suâ etiam sententiâ condemnaret, hanc rationem subiicientes : *Arbitramur enim auctoritati Sanctitatis tuæ de sanctarum Scripturarum auctoritate depromptæ, facilius eos qui tam peruersa & perniciofa sentiunt, esse cessuros. Quibus verbis & singularem ad comprimendas hæreses auctoritatem in Romano Pontifice, eamque Conciliis potio-rem agnoscunt : atque illius robur è diuinarum Scripturarum exundante copiâ peti- tum, hoc est, iuris esse diuini affirmant. Addam magnum Magni illius Basilij testimonium. Ille tumultuantibus in Oriente hæreticis, quomodo hac etiam ætate noua monstra sibi inuicem impingunt Cadmei isti fratres, monet per litteras Athanasium, vt ad Romanum Episcopum scribatur, qui suâ auctoritate in istâ causâ usus, viros eligat idoneos, qui seditiosos reprimant. Causam verò in aliâ*

Vide August. Epistolâ 91.

Basilij Epist. 52.

Epistolâ, per Sabinum Diaconum ad Pontificem redditâ, expressit; *Quia*, inquiens, *pietati tuæ datum à Domino est, quod adulterinū est à legitimo & puro discernere, ac fidem Patrum sine ullâ subtractione prædicare.* Epiphanius quoque hîc se sistit, dum seriem Romanorum Pontificum contra Carpocratianos produ-  
 Hæres. 27 ducens, addit se ad hoc impulsus, *eò quòd per hos semper, quod in fide manifestum & certum est, ostenditur ac declaratur.* Quid si Ambrosium, Augustinum, Hieronymum, & sexcentos alios in aciem produxero, sermo me citiùs quàm testimonia deficerent. At non patiar inuictos Cæsares hac in re aquilas non at- tollere, non explicare signa, non pro- uocare ut secum posthac idem sentiant Serenissimi Magnæ Britannæ Reges, & confœderati Ordines Belgarum. Prodeat omnimodæ pietatis satellitio  
 Tom. 2. instructus Valentinianus Tertius, qui  
 Concil. in per Epistolam Theodosium Iuniorem  
 præamb. instruit, *Romanæ ciuitatis Episcopo, prin-*  
 Concil. cipal-

*patum sacerdotij super omnes, Antiquitatem contulisse. Comitetur Valentinianum Marcianus, hac voce Leonem Papam compellans: Tuam sanctitatem, principatum in Episcopatu fidei obtinentem, inuitamus atq; rogamus ad celebrandam Synodum te auctore. Subsequatur hos Iustinianus, magnus ille Legum arbiter, asserens, neminem esse qui dubitet, summi Pontificatus apicem apud Romanum Pontificem esse. Claudam hoc totum vnâ illâ & communi omnium Episcoporum voce in Chalcedonensi Concilio pronuntiatâ, Primatum omnem & honorem præcipuum Romano Episcopo deberi.*

Constit.  
Nouell.  
131.

A& 16.

Agnouerunt omnes hi in Ecclesiâ, quæ vna domus, ciuitas, nauis, ac vnum corpus in Litteris diuinis nuncupatur, regimen Monarchicum: quod frustra in Aristocraticum (vt hac ratione non per ostium, sed aliunde te ingeras) commutare laboras: quasi etiam tuæ solitudini demandata foret vniuersalis Ecclesia. Cur non eandem Alexandri-

no Episcopo demandatam , B. Hieronymus censuit? de quo tamen in Epist. ad Pammachium, *Responde*, inquit, *mihi, ad Alexandrinum Episcopum Palæstina quid pertinet?* Similiter D. Chrysostomus apud Innocentium I. per litteras queritur de Theophilo urbis eiusdem Patriarchâ, quòd cùm esset in Ægypto, iudicium ferre præsumeret de illis qui morabantur in Thraciâ. Quid fuit, cur minus semper auctoritatis Ariminensi Concilio, cui DC. Episcopi interfuerunt, omnes Catholici detulerint, quàm Constantinopolitano priori è centum dumtaxat & quinquaginta Episcopis coacto, nisi quòd hoc præ illo Romani Pontificis, in quo summa Ecclesiæ potestas residet, auctoritate indictum, celebratum, firmatumque fuerit? Vt enim inferiores Episcopi definitas habent regiones, ita & potestatem: quia verò Pontifex Romanus toti Ecclesiæ præest, totâ etiam, vt sic dicam, potestate præ-

præfulget, *semperque*, verba sunt S. Augustini, in Romanâ Ecclesiâ *viguit Apostolica Cathedra principatus*. Epist. 162

Viden' quòd nullæ hîc errorum incudes, nullus nouorum fidei dogmatum contra diuinam institutionem, & Orthodoxam doctrinam Conciliorum & Patrum, priscamque ac receptam Ecclesiæ consuetudinem partus, quem tamen Rom. Pontifici ita subdolè supponis. Cuius calumniæ causam mihi attigisse videtur Comicus, dum ait: *Qui semel verecundiæ fines transgressus fuerit, eum oportet gnauiter esse impudentem*. Indubitatum fuit apud omnes, soli Petro, non aliis siue Apostolis, siue Principibus, Tiberio, Pilato, Herodi, à Pastorum Principe dictum, *Pasce oues meas*. Ioan. 21. & : *Tu es Petrus, & super hanc petram* Matth. 16 *ædificabo Ecclesiam meam*. iterùm : *Tu aliquando conuersus, confirma fratres tuos*. Luc. 22. denique : *Tibi dabo clauēs regni cælorum*. Matth. 16 quâ Domini voce Apostolorum Principi curam Ecclesiæ commissam, vni-

Ephes. 4.

uersa Antiquitas colligit. Episcopos, non Principes sæculares posuit Spiritus sanctus regere Ecclesiam Dei : neque inter eos quos fidelibus suis præesse Christus voluit, Regum memoria celebratur, sed Prophetarum, Apostolorum, Pastorum, Doctorum. Hos velut operarios in vineam à Domino missos, & diuinorum mysteriorum dispensatores omnibus sæculis reputarunt Christiani Imperatores, Reges, Principes, neque se à iugo Apostolicæ iurisdictionis exemerunt. Hinc olim Constantio Imperatori aduersus S. Athanasium debacchanti, Cordubensis Episcopus Hosius per Epistolam significabat: *Ne te misceas Imperator rebus Ecclesiasticis, neque nobis in hoc genere præcipe, sed potiùs ea à nobis discere. Tibi Deus Imperium commisit, nobis quæ sunt Ecclesiæ concredidit.* Pari modo, causâ non dissimili, eidem respondit Leontius Tripolitanus Episcopus, vt videre est apud Suidam; eumque quòd de rebus fidei Dei cognitionem sibi ar-  
roga-



rogaret , Antichristum pronuntiauit In Epist.  
nominatus Athanasius. Sed & B. Am- ad solit.  
brosius Valentinianum Iuniorem his vit. agent.  
verbis præsens compellabat : *Noli te* Ep. 33. ad  
*grauare Imperator , ut putes te in ea qua* Sororem.  
*diuina sunt , Imperiale aliquod ius habere.*  
*Noli te extollere , &c. Ad Imperatorem pa-*  
*latia pertinent , ad sacerdotem Ecclesia. &*  
*apertiùs in eadem Epistolâ : Quando au-*  
*disti clementissime Imperator in causâ fidei*  
*laicos de Episcopo iudicasse ? & Epist. 32.*  
*Valentiniani Senioris lege definitum af-*  
*firmat , in causâ fidei , vel Ecclesiastici or-*  
*dinis , eum iudicare debere , qui nec munere*  
*impar sit , nec iure dissimilis. Quin si vlli*  
*in orbe Christiano , certè Anglorum*  
*Reges olim Pontificem Romanum non*  
*modò regiminis Ecclesiastici Prima-*  
*tem , vniuersalis Ecclesiæ Patrem , Sa-*  
*cerdotum Principem , Petri successo-*  
*rem , Orbis Episcopum professi semper*  
*& protestati : sed insuper regnum suum*  
*eidem vectigale fecerunt , ut fusè perse-*  
*quitur Polydorus Virgilius , qui & ipse*

facri illius vectigalis domesticatim collecti quæsturam annis aliquot gessit, eiusque muneris obeundi causâ primum in Angliam venit. Si pietatis huius & auitæ Religionis, quam luxuriæ spiritus in plerisque regionibus ita labefactauit, vt ne vestigium vllum reliquerit, restituendæ gratiâ è Dalmatiâ euolarit, sæuasque Alpes percurrerit Archiepiscopus Spalatensis, vtq; Christianos Principes potestatis suæ sceptrum, non ad Ecclesiæ principatum, sed protectionem duntaxat extendere, antecessorum suorum exemplis, Patrumque Fontibus vbertim sonantibus doceat, dignam profectò rem præstiterit, omnemque inconstantie maculam hac spongiâ facile absterferit.

Habes Principatus Ecclesiastici indubitatos testes: neque defunt qui in eodem temporalis etiam potestatis maiestatem, non commentitiam, vel vsurpatam; sed veram, ac tremendam, profligatâ blasphemix tuæ peste, fortiter pro-

propugnent. Potuissẽm hĩc numerosas  
 Illustrium virorum, quos sæcula priora  
 pepererũt, acies instruere : sed quoniam  
 sub eruditionis suæ vexillis eos in hu-  
 ius argumenti fecundissimum cam-  
 pum eduxit nuper Cardinalis Bellar-  
 minus , exiguum dumtaxat manipu-  
 lum è multis euocabo. Ferant hĩc pri-  
 mas sanctissima decem Conciliorum  
 decreta, & inter illa Generalis Latera-  
 nensis (quod iure Maximum nuncupa-  
 tur) sub Innocentio I I I. Patriarcharum  
 quattuor, Archiepiscoporũ septuagin-  
 ta, CCCC. XII. Episcoporum, Abbatum  
 Priorumq; conuentualium DCCC. Le-  
 gatorum Imperij Occidentis & Orien-  
 tis, pluriumque Christianorum Regum  
 conuentu celeberrimi, Canon ordine  
 tertius. Hĩc post nonnulla aduersus  
 hæreticos sancita, Summo Pontifici in  
 Dominos temporales potestas decerni-  
 tur, *si quando admoniti ab Ecclesiã, terram  
 suam ab hæreticã fœditate purgare neglexe-  
 rint.* cui etiam eadem tempestate com-  
 missum,

De pote-  
 state Pon-  
 tific. in tẽ-  
 poral.

missum, post annalem contumaciam, *vasallos ab eorum fidelitate absolutos denuntiare, terramque ipsorum Catholicis occupandam exponere, qui eam, exterminatis hæreticis, sine ullâ contradictione possideant, &c.* Si hanc non agnoscit Ecclesiæ vocem *M. Antonius de Dominis*, ubi obsecro eam reperiet? & si verissimè talis est, cur eam non audit? cur potestatem de temporalibus disponendi, in Sacerdotum Principe per summam temeritatem eneruare contendit? Addam superiori Generali insuper Lugdunense etiam Generale Concilium, anno post incarnatum Verbum *M. C. C. X L V.* qui trigesimus erat à priore Lateranensi, Innocentio I V. præsidente, Balduino quoque Orientis Imperatore, aliisque Principibus confidentibus, indictum. ubi ab vniuersâ Ecclesiâ, quam sine dubio conuentus ille augustissimus repræsentabat, in Fredericum II. Imperatorem lata est depositionis sententia: cuius tenorem, quòd æquo videretur pro-

prolixior, studio præteriuimus. B. Augustinus Concilium Palæstinum quatuordecim tantummodò Episcoporum, vnius Iuliani audaciæ comprimendæ plus quàm sufficiens existimauit; & non valebit tantorum, Episcoporum, Principum, Doctorum, aduersus vnius hominis, qui velut nouus Ismaël è regione fratrum suorum figit tabernaculum, temeritatem sententia? Nondum tamen hîc sisto. Occurrit ecce Leo Isauricus, quondam Imperator, tandem fidelium communionem, vectigalibus Italiæ, & per hoc Imperij non contemnendâ portione, auctoritate Apostolicâ quam Gregorius II. exercuit, multatus; cuius rei præcones è Græcis Glycas, Theophanes, Cedrenus, inter Latinos Sigebertus circa annû DCCXXVII. Paulus Diaconus, & alij; factumque Pontificis Episcoporum Synodus probauit. Quid? quòd in Romanâ Synodo, Gregorio VII. Pontificatum obtinente, Henricus IV. Imp. quem Tertium

titum alij dicunt, & in Claramontano Concilio sub Urbano I I. Philippus I. Galliarum, & à Paulo I I. Georgius Bohemiæ Rex anathemate percussus, & Regno Imperioque exutus, testes habemus Sigebertum <sup>a</sup> & Iuonem <sup>b</sup> Episcopum Carnotensem. Quin diuus etiam Bernardus vtrumque gladium Ecclesiæ impartit; spiritualem & materiale: atque hunc non modò pro Ecclesiâ, sed ad nutum insuper Sacerdotis (vtrique Principis & Summi) exerendum, mirâ verborum suauitate inculcat. Quid referam doctissimû illum Saxonem Hugonem Victorinum? *Spiritualis*, inquit ille, *potestas terrenam & instituere habet vt sit, & iudicare habet si bona non fuerit.* Consentit his, vt alios transeam, Doctor Angelicus, Alexandri Halensis magistri sui vestigia æquis passibus insecutus. ita enim scribit: *Potestas secularis subditur spirituali, sicut corpus animæ: & ideò non est vsurpatum iudicium, si spiritualis Prelatus se intromittat de temporalibus*

<sup>a</sup>Circa an  
nû 1095.  
<sup>b</sup>Epist. 28  
Lib. 4. De  
confide-  
rat. c. 4.

P. 2. lib. 2  
De Sacra.  
cap. 41.

2. 2. q. 60.  
art. 6. ad 3

*ralibus.* Negat D. Thomas, temporalem  
 Ecclesiastici Prælati potestatem esse v-  
 surpatam; & eandem in summo Præ-  
 lato talem, obgannit *M. Antonius* : in In 2. Séc.  
 quo tamen idem Doctor , occasione dist. 44.  
 haud absimili, vtriusque potestatis, spi-  
 ritualis & temporalis, apicem sine ter-  
 giuersatione vllâ constituit. Parem in  
 eodem prærogatiuam clarissimi Iuris L. Si Im-  
 interpretes Bartolus & Baldus agno- per. c. De  
 scunt , dum in solo Pontifice reside- legib. 6. 4.  
 re ius inuiolabile commutandi Impe- Baldus in  
 ria , eorumq; Dominos possessionibus, proœmio  
 dignitate, ac Principatu etiam ipso, cau- ff. vet.  
 sâ subsistente, priuandi, luculenter defi-  
 niunt. In hac Conciliorum & Scripto-  
 rum luce non est quòd latebras vllas ob  
 nuperum interdictum quæras *Marce*  
*Antoni.* concusserit te fortassis paternâ  
 illâ castigatione dignum, fulminis Va-  
 ticani fragor; cur Sede, regione, gre-  
 ge , nescio an non etiam Religione, ex-  
 cussit? nisi quòd *superbieris, nolens obe-* Deut. 17.  
*dire summi Sacerdotis imperio.* quod Mo-  
 saicæ

Lucæ 10. *saicæ legis à Deo præscriptæ, ac Christi voce firmatæ instituta meritò habent, æternumque habebunt*

*—ceus grande nefas, & morte piandum.*

Atque hæc pauca breuitatis institutæ studio à me apposita, elicit profectiōis seu defectiōis potiùs tuæ malè sanū Consilium, Antistes Reuerende: quæ ubi digesseris, inferam solidiora: neq; enim poterat stomachus tuus sub hæc initia errorum nauseabundus supra vires onerari. Satis superque Catholico inspectori factum reor, vt Consilij tui nocte depulsâ, veritas elucescat; & quæ in controuersiam abs te vocantur, Patrum auctoritate commendata firmiter apud eum retineantur. *Deus autem, quem communibus votis obsecramus, qui dixit de tenebris lumen splendescere, ipse illuceat in corde tuo ad illuminationem scientiæ claritatis Dei, Ut abdicatis occultis dedecoris, non ambules in astutiâ, neque adulteres verbum illius, sed in manifestatione veritatis, commendes te-*  
met-

2. Cor. 4.



*metipsum ad omnem conscientiam hominum  
 coram Deo. hoc est enim quod singulari  
 adfectu Corinthiis suis Paulus Apo-  
 stolus exoptat: idem etiam tibi eueniat,  
 omnes vouemus. Abominabiles Deo  
 sunt induiti veste peregrinâ. hanc exue, vt Sophon. 1  
 Christum iterum induas. fuge deserto-  
 rum Catholicæ Religionis lupanar, no-  
 ui Euangelij steriles virtutibus fructus  
 fucosque veneranda tua canities refu-  
 giat: non te auertat ab vberibus matris  
 Ecclesiæ, spectata præcedenti tergo  
 mantica; tuam inspice. Quis enim det te Cant. 8.  
 fratrem meum sugentem vbera matris meæ,  
 vt inueniaris foris? Noli respicere post ter- Gen. 19.  
 gum tuum, nec stes in omni circum regione,  
 sed in monte (monte inquam illo Sion,  
 monte Dei, monte pingui & coagula-  
 to) saluum te fac. Confuge ad Ecclesiam,  
 in cuius gremio mori felicius dixit ma-  
 gnus Poloniæ Cancellarius Samoscius,  
 quàm nasci ab initio. Captiua intelle-  
 ctum in obsequium Christi, & consi- Eccli. 37.  
 lij tui, quod in ipso omni tempore permaneat, Tob. 4.  
 F cor*

*cor tecum statue, priusquam veniat dies illius magna, & suprema trutina minus habentem inueniat. Cogita, quod præclarum illum senem Eleazarum fecisse Machabæorum memorant Annales,*

2. Mac. 6. *ætatis ac senectutis tuæ eminentiam dignam, atque à puero optimæ conuersationis actus: illiusq; exemplo blandienti tuæ Agar, secundum sanctæ & à Deo conditæ legis constituta responde: Non est dignum ætati meæ, neque dignitati, fugere, vt multi adolescentiores, carnis ærisque sacrilegâ diffibulatione resoluti, arbitantes Marcum Antonium de Dominis sexaginta annorum scientiâ Rhetorem, Mathematicum, Philosophum, Theologum, dignitate Archiepiscopum, transisse ad vitam alienigenarum, & ipsi propter meam inconstantiam, & modicum corruptibilis vitæ tempus decipiantur, & per hoc maculam & execrationem meæ senectuti conquiram. Teneant te hominem rectè credentem in Ecclesiâ Catholicâ, tot & tanta Christiani nominis charissima*

vin-

vincula, quæ B. Augustinum tenuerunt, quæque ille ipse enumerans, ita aduersus Epistolam Fundamenti scribit: *Multa sunt quæ in Ecclesiæ gremio iustissimè teneant: tenet consensus populorum atque gentium: tenet auctoritas miraculis inchoata, spe nutrita, charitate auclata, vetustate firmata: tenet ab ipsâ Sede Petri Apostoli, cui pascendas oues suas post resurrectionem Dominus commendauit, usque ad præsentem Episcopatum, successio Sacerdotum: tenet postremò ipsum Catholica nomen, quod non sine causâ inter tam multas hæreses sic ista Ecclesia sola obtinuit, ut iam omnes hæretici se Catholicos dici ve'int.* Ne ergo te excutiant, quæ sanctissimum illum Episcopum tenuerunt. Gloriare potiùs in Domino, non solum cum doctissimo Hieronymo, quod ab Epist. ad Pâmach. *ipsis incunabulis Catholico sis lacte enutritus*; verum etiam cum celeberrimo Basilio, quod licet reliqua vita tua digna Epist. 79. *sit, cuius gratiâ ingemiscas, numquam tamen falsas opiniones de Deo* (eiusque Ecclesiâ)

clesiâ) habueris, neque aliter sentiendo animi iudicium in fide mutaueris. Igitur, quod extremum tuæ menti infixum optauerim, cùm charitatem tuam primam reliqueris, Apostolici consilij, & simul vnde excideris memor, dum adhuc vitæ spes dubia affulget, age pœnitentiam, & priora opera fac. Sin autem: venio, inquit Dominus, tibi, & mouebo candelabrum tuum de loco suo.

Apoc. 2.



**E**XAMEN *hoc Profectionis Marci Antonij de Dominis, in quo eam esse meram Defectionem & Discessionem, solide disertq; ostenditur, dignum est quod typis euulgetur. Actum Antuerpia XVII. Ianuarij, Anno M. DC. XVII.*

P. Coens S. T. L. Canonicus & librorum Censor Antuerpiensis.

## S V M M A P R I V I L E G I I.

**A**LBERTI & ISABELLÆ CLARÆ EVGENIÆ Archiducum Austriae, Ducum Burgundiae, Brabantiae, &c. Serenissimorum Belgicae Principum, Privilegio cautum est; nequis, Laurentij Beyerlinck Archipresbyteri Antuerpiensis Examen Profectionis M. Antonij de Dominis quondam Archiepiscopi Spalatensis, prater Balthasaris & Ioannis Moretorum fratrum voluntatem ullo modo imprimat, aut alibi terrarum impressum in has Inferioris Germaniae ditiones importet, venalēve habeat. Qui secus faxit, confiscatione librorum, & alia graui pœna mulctabitur, uti latius patet in litteris datis Bruxellæ, XXII. Ianuarij, M. DC. XVII.

Signat.

De VVitte.



BIBLIOTHECA NAZ.  
ROMA  
VITTORIO EMANUELE









4-18-2